



**Sud Bosne i Hercegovine**  
**Суд Босне и Херцеговине**

---

**Broj: S1 3 P 038326 20 Iž**  
**Sarajevo, 27.10.2020. godine**

Sud Bosne i Hercegovine, u drugostepenom vijeću sastavljenom od sudija Vesne Trifunović kao predsjednika vijeća, Dinke Bešlagić Čovrk i Srete Crnjak kao članova vijeća, odlučujući o žalbi Mahmutović Osmana, 3015 Trowbridge st. Hamtramck MI 48212, USA, koja osporava odluku Centralne izborne komisije BiH broj 05-1-07-1-998/20 od 01.10.2020. godine o odbijanju upisa u izvod iz Centralnog biračkog spiska za glasnje izvan BiH za Lokalne izbore 2020. godine, u nejavnoj sjednici, održanoj dana 27.10.2020. godine, donio je

**R J E Š E N J E**

Žalba se odbija.

**O b r a z l o Ź e n j e**

Centralna izborna komisija Bosne i Hercegovine je Odlukom broj i datum navedeni u uvodu odbila upis u izvod iz Centralnog biračkog spiska za glasnja izvan BiH za Lokalne izbore 2020. godine po podnesenim prijavama do 01.09.2020.godine jer nisu ispunjeni uslovi propisani članom 3.15. stav 1, 2 i 3 Izbornog zakona BiH.

Navedenom odlukom odbijena je prijava Mahmutović Osmana koji je blagovremeno izjavio žalbu u kojoj je naveo da je poslao prijavu za glasanje putem pošte sa dokumentacijom.

Centralna izborna komisija Bosne i Hercegovine dostavila je ovom sudu odgovor na žalbu u kojem je predložila da se izjavljena žalba odbije kao neosnovana jer žalitelj nije upisan u Centralni birački spisak, pored toga što je uz svoju prijavu za glasanje izvan BiH dostavio valjan dokaz o identitetu, da bi bio upisan u izvod u Centralni birački spisak za glasanje izvan BiH bio je dužan da dostavi i valjan dokaz o prebivalištu u BiH, što nije učinio, zbog čega je CIK BiH njegovu prijavu odbila.

Ispitujući pobijanu odluku u okviru žalbenih navoda vijeće Apelacionog odjeljenja Suda Bosne i Hercegovine je zaključilo da žalba nije osnovana.

Pravilna je i zakonita odluka Centralne izborne komisije BiH kojom je odbijena prijava Mahmutović Osmana za upis u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine.

Iz predmeta spisa utvrđeno je da je žalitelj na propisanom obrascu, elektronskim putem, podnio prijavu za glasanje izvan BiH u kojoj je naveo da privremeno boravi van BiH i zahtjevala dostavu glasačkog materijala na njegovo ime na adresu 3015 Trowbridge st. Hamtramck MI 48212, USA . Uz prijavu žalitelj je dostavio kopiju pasoša Bosne i Hercegovine izdatog u DKP Čikago, te da je kao status u kojem boravi izvan BiH označio privremeni boravak. Međutim, nije dostavio validan dokaz o prebivalištu.

Da bi državljanin Bosne i Hercegovine, a koji privremeno živi u inostranstvu ostvario pravo da se upiše u izvod iz Centralnog biračkog spiska za glasanje van BiH, uslov je da je upisan u Centralni birački spisak, što je propisano odredbom člana 3.15 stav 1 Izbornog zakona BiH.

I ako je žalitelj državljanin Bosne i Hercegovine, pošto nema prijavljeno prebivalište na teritoriji BiH, nije upisan u Centralni birački spisak od strane nadležnog organa kako to propisuje odredba člana 3.13 u vezi sa članom 3.5 Izbornog zakona, pa time nije ispunjen osnovni uslov za ostvarivanje prava za glasanje van BiH.

S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita a žalba neosnovana pa je istu, primjenom odredbe člana 81 stav 1 Zakona o upravnim sporovima Bosne i Hercegovine (Sl. glasnik BiH br. 19/02 do 74/10) valjalo odbiti.

**PREDSJEDNIK VIJEĆA**

**SUDIJA**

**Vesna Trifunović**